

**anuncios>>**

## **IAS Xixón denuncia'l procesu d'escoyeta pal "PLAN JOVEN"**

El portavoz d'Izquierda Asturiana (IAS)-Xixón, Pablo Rodríguez, denuncia'l desastrosu y chapuceru procesu d'escoyeta que se fixo nes últimes selmanes pa les places del Plan Mozu. Asinamesmo rique de los conceyales d'emplegu y de promoción económica, esclarien dafechu toles incorrecciones y inexactitúes que se llevaren a cabu nesti procesu, entamando pel **"flagrante incumplimientu de los plazos tanto de publicación de resultaos del esame como de contratación, asina como l'axudicación de delles places per simple rifa darréu que les esplicaciones daes hasta agora son claramente insuficientes"**.

El portavoz local preguntóse si *"esti Conceyu gobernáu pola llamada «izquierda plural» ta torgáu pa facer un procesu d'escoyeta de personal ensin qu'asocedan coses estrañes"*.

Izquierda Asturiana (IAS) pide'l cese del director del Plan d'Inserción Laboral como primer responsable d'esti procesu d'escoyeta, que considera foi, *"un auténticu depropósitu y una falta de respetu a los y les aspirantes."*

## **La UNESCO dixo NON**

La candidatura que pidía la reconocencia de la cultura inmaterial de Galicia y Portugal, y qu'abarcaba parte del occidente asturianu refugóla la UNESCO.

Izquierda Asturiana (IAS) yá denunció tres de la presentación de la candidatura en San Tiso d'Abres, l'intentu del gobiernu gallegu de promocionar la so política cultural en territoriu de soberanía asturiana nel que'l gobiernu de Galicia nun tien nenguna atribución.

Los responsables de la candidatura qu'incorpora elementos culturales asturianos en momentu nengún se dirixeron de manera formal a los

responsables de los conceyos asturianos afectaos pola candidatura, nin fixeron casu de la opinión que dende'l primer día tuvo la sociedá asturiana, que refugó tal candidatura.

Ye por ello que mias>> quier espresar la so satisfacción énte lo que considera un actu de xusticia, y ta al enfotu que los promotores de dicha candidatura asuman que la política cultural n'Asturies namái pue facese dende instituciones asturianas y con criterios asturianos.

D'igual miente IAS recuerda al gobiernu de PSOE-IU-BPA qu'ellos son los máximos responsables de que dende Galicia s'intente remanar la política cultural y llingüística del occidente'l país, al vulnerar constantemente los derechos llingüísticos de los ciudadanos negando una y otra vuelta la oficialidá del asturianu y del gallego-asturianu nel so territoriu.

## **mias>> frenó "El Castañazo"**

Tres l'apaición na prensa asturiana d'una noticia onde'l Conceyu de Mieres daba anuncia d'una nueva fiesta nomada "El Castañazo", mias>> protestó enérxicamente, siendo publicao na prensa de les cuenques, escontra la vergoña ayena que sintíemos al apautar esi nomatu ensin significáu pa los asturianos, en cuenta del tradicional "Amagüestu", al tiempu que se desixía l'emplegu de la llingua asturiana na campaña.

## **AMAGÜESTU SÍ "CASTAÑAZO" NON**

Finalmente, el Conceyu de Mieres dio marcha atrás y llámalu "El Castañazu", incluyendo un Amagüestu y la campaña en llingua asturiana, cumpliendo unos mínimos que camentáremos básicos.

mias>> va sigur faciendo un apueste polos nomes y denominaciones más tradicionales y enraigonaos del país y con esi enfotu continuar trabayando y obligando a les instituciones a cuidar el patrimoniu d'Asturies.

Nº 4. Avientu - 2005

Cartafueyu de Mucedá d'Izquierda Asturiana.

na cai

04

## lilingua>>

### Éxitu de la Fielga de Xunta Moza

**mias>>** califica d'éxitu la II Fielga entamada por **Xunta Moza** al pasáu 23 de payares na secundaria y bachiller de tol país.

Les cifres apurríes polos convocantes espeyen un porcentaxe d'un **80% de paru**, lo que retrata perbién el conflictu llingüísticu n'Asturies, sobremanera ente la xente más mozo.

**mias>>**, poro, felicita'l llabor de **Xunta Moza** y afalágalos a siguir trayabando col mesmu enfotu y procuru pa cola **mocedá d'Asturies** que sigue tando "castigada" a nun poder estudiar llingua asturiana nel so propiu país.



Per otru lláu, **mias>>** tuvo presente en sofitu na manifestación entamada polos convocantes, repartiendo material de la organización, panfletos, el cartafueyu d'información "na cai>>", pegatines y chapas ente los presentes y dexóse ver, **esparciendo** ente los más de 200 asistentes, el modelu que queremos p'Asturies.

## enseñu y trayabu>>

### L(I)OE, relixón y conciertos

Énte'l debate mediáticu entamáu na que cinca a la reforma de la Llei Orgánica d'Educación, **mias>>**, amuesa la so postura basada en dos finxos básicos: una **enseñanza pública asturiana**, onde toes y toos tengamos los mesmos drechos y posibilidaes, y, per otru lláu, que seya dafechamente **llaica** y de **calidá**.

Nun podemos escaecer que dende la **ultraderecha española** tán calteniéndose postures impropies nun estáu supuestamente

**aconfesional** y que debiere ser **llaicu**, polo que desiximos al gobiernu estatal la supresión de los conciertos, ye dicir, les **perres públiques** qu'al traviés de subvenciones acaben nos colexos privaos, centros nos que se prioricen los alumnos, de tal mou que "conderguen" a la enseñanza pública a ser la de los desfavorecíos.



En **mias>>** creemos que la relixón, nun puede tener sitiu nel **enseñu públicu** y mucho menos que seya computable nos espedientes, porque ye un tema esclusivu del ámbetu privau, que nun ha condicionar de nenguna manera'l sistema educativu d'un estáu.

Por too ello, dende **mias>>** desiximos al gobiernu estatal una fonda y verdadera **reforma** del sistema educativu que dea igualdá d'oportunidaes a toles families, que cude los drechos de los estudiantes d'Asturies y que nun transixa coles desixencies del estamentu clerical más **ranciu** y **atrasáu**.

### "Lo primero lo de toes y lo de toos"

**mias>>** va tener presencia na manifestación convocada pal día **14 d'avientu** n'Uviéu por una **escuela pública, asturiana, llaica y de calidá**.

La movilización, de la cual ye convocante **Izquierda Asturiana**, entamará na Estación de Renfe d'Uviéu a les **18.00 hores** y fadrá por espeyar l'esmolecimientu col que dende'l nuesu país se ve la situación del enseñu.

Dende **mias>>** animámoste a tar con nós nesta manifestación dexando bien a les clares que la mocedá d'Asturies nun igua con un sistema educativu escluyente y desigual nel que les oportunidaes nun son les mesmes pa tol alumnáu.

## en trés entruques>>

### Pablo Rodríguez, voceru d'IAS-Xixón

#### 1>> ¿Cómo ñaz IAS-Xixón?

**IAS** en Xixón ñaz col envís de dar una alternativa d'izquierdes, ecoloxista y asturianista a los ciudadanos de Xixón. **Izquierda Asturiana** vien trayabando nel conceyu, denunciando una realidá política en Xixón que nun nos presta y que creemos meyorable. Un de los pasos más importantes qu'**IAS-Xixón** va dar p'afitar la so presencia ye la inmediata inauguración oficial del so local en Xixón, asitiáu **na cai Sanz Crespo**.

#### 2>> ¿Qué oxetivos vos marcáis?

L'oxetivu ye construyir una **opción** al bipartidismu que sufrimos en Xixón ente un gobiernu municipal PSOE-IU-BPA enfotáu en desenvolver polítiques faraónicas y agresives pa col bienestar de la población (superpuertu, metrotrén, zalia, PXOU, regasificadora, etc.) y una oposición a la derecha que nun consideramos como solución a los problemes de Xixón. Queremos ser un **espaciu d'alcuentru** de toles persones disconformes cola actual política del gobiernu municipal.

#### 3>> ¿Cómo colaborar con IAS-Xixón?

Hasta la inauguración oficial de la sé local, de la que va dase puntual información, la xente interesao en trabayar con nós puede ponese en contautu al traviés de la dirección de correu electrónicu [xixon@ias.as](mailto:xixon@ias.as)

## na cai>>

Faite con ún de de los 2500 exemplares de "na cai>>" que cada mes vas poder ver na Universidá, en dellos centros culturales y de mocedá, institutos... o na nuesa páxina web [www.ias.as/mias](http://www.ias.as/mias)



+info +semeyes +contautos  
+materiales +a la esquierda:  
**+trabayu por Asturias**

### Mocedá d'Izquierda Asturiana

[www.ias.as/mias](http://www.ias.as/mias) >> [mias@ias.as](mailto:mias@ias.as)  
Primo de Rivera, 1, Oficina 9. 33333 Uviéu.

